

НЕДЕЛЯ ТРЕТЯЯ ПО ПАСЦЕ,

Святых жен мироносиц, и Иосифа праведнаго.

В СУББОТУ ВЕЧЕРА, НА МАЛЕЙ ВЕЧЕРНИ.

Стихиры воскресны, 3. Глас 2-й:

Прежде век от Отца рождшемуся Божию Слову, воплощемуся от Девы Марии, приидите поклонимся: Крест бо претерпев, погребению предадешся, яко Сам восхоте: и воскрес из мертвых, спасе мя заблуждающаго человека.

Христос Спас наш, еже на ны рукописание пригвоздив на Кресте заглади, и смертную державу упраздни: покланяемся Его тридневному Воскресению.

Со архангелы воспоим Христово Воскресение: Той бо есть Избавитель и Спас душ наших, и в славе страшней и крепчей силе, паки грядет судити миру, егоже созда.

И восточен [анатолиев], глас 2-й:

Тебе распеншагося и погребеннаго, ангел проповеда Владыку, и глаголаше женам: приидите видите, идеже лежаше Господь: воскрес бо, якоже рече, яко всесилен. Темже Тебе покланяемся единому безсмертному: Жизнодавче Христе, помилуй нас.

Слава, глас 2-й:

Почто мира со слезами, о ученицы растворяете, камень отвалися, гроб истощися: видите тлю животом попоранную, печати свидетельствующя явственно, спящия люте стражники непокоривых, смертное спасешся плотию Божиею, ад рыдает. Текша радостию рцыте апостолом: умертвивый смерть Христос, перворожден из мертвых, вас предваряет в Галилеи.

И ныне: догматик, глас 2-й:

О превелія таинства! Зря чудеса, проповедую Божество: Еммануил бо естества убо врата отверзе яко Человеколюбец: девства же заключения не разруши яко Бог: но сице от утробы пройде, якоже слухом вниде: тако воплотися, якоже зачатся. Безстрастно вниде, несказанно изыде, по пророку глаголющему: сия врата заключена будут, никтоже пройдет ими, токмо един Господь Бог Израилев, имеяй велию милость.

Свете тихий: **Прокимен: Господь воцарися:**

На стиховне стихира воскресна, и Богородицы, глас 2-й:

Подобен: Егда от Древа:

Стих: Помяну имя Твое во всяком роде и роде.

Всех скорбящих радости, и обидимых предстательнице, и убогих питательнице, странных же утешение, и жезле слепых, немощных посещение, труждающихся покрове и заступнице, и сирых помощнице, Мати Бога Вышняго Ты еси Пречистая: потщися, молимся, спастися рабом Твоим.

Стих: Слыши Дщи и виждь, и приклони ухо Твое.

Всякое беззаконие нещадно, всякий грех невоздержно окаянный соделах, всякаго осуждения достоин есмь: вины покаяния мне подаждь Дево, яко да не осужден тамо явлюся. Тя бо напишю молитвенницу, Тя призываю предстательницу, да мя не посрамиши Богоневестная.

Стих: Лицу Твоему помолятся богатии людстии.

Инаго прибежища Чистая, к Творцу и Владыце не имамы, разве Тебе Богоневесто, да не отринеш нас теплым Твоим предстательством, ниже посрамиши любовию притекающих под кров Твой, Мати Бога нашего: потщися, и Твою помощь даждь, и нынешняго гнева нас спаси.

Слава, и ныне: глас 2-й:

Мироносицы жены, утру глубокоу, ароматы взявша, Господня гроба достигоша, яже не надеяхуся обретша помышляху благоговееюще каменному отвалению, и друга ко друзей глаголаху: где суть печати гроба? где есть Пилатова кустодия, и опасное утверждение? Бысть же возвеститель не разумевающим женам, блистайся ангел, и глаголай к ним: что с рыданием ищите живаго и оживотворившаго род человеческий? Воста Христос Бог наш из мертвых яко всемогущ, подай всем нам нетление и жизнь, просвещение и велию милость.

По Трисвятом тропарь Глас 2-й:

Благообразный Иосиф, с Древа снем пречистое тело Твое, плащаницею чистою обвив, и вонями во гробе нове покрыв положи: но тридневен воскресл еси Господи, подай миру велию милость.

Слава, и ныне:

Мироносицам женам, при гробе представ ангел вопияше: мира мертвым суть прилична, Христос же истления явился чуждъ. Но возопийте: воскресе Господь, подай миру велию милость.

И отпуст

НА ВЕЛИЦЕЙ ВЕЧЕРНИ.

Христос воскрес: яко обычно. Таже псалом предначинательный: Благослови душе моя Господа: И кафисма 1 Псалтира.

На Господи воззвах: поставим стихов 10, и поем:

Стихиры воскресны, 3, глас 2-й:

Стих: Изведи из темницы душу мою, * исповедатися имени Твоему.

Прежде век от Отца рождшемся Божию Слову, воплощшемся от Девы Марии, приидите поклонимся: Крест бо претерпев, погребению предадся, яко Сам восхоте: и воскрес из мертвых, спасе мя заблуждающего человека.

Стих: Мене ждут праведницы, * дондеже воздаси мне.

Христос Спас наш, еже на ны рукописание пригвоздив на Кресте заглади, и смертную державу упраздни: покланяемся Его тридневному Воскресению.

Стих: Из глубины воззвах к Тебе Господи, * Господи, услыши глас мой.

Со архангелы воспоим Христово Воскресение: Той бо есть Избавитель и Спас душ наших, и в славе страшней и крепчей силе, паки грядет судити миру, егоже созда.

И восточны [анатолиевы] 4. Глас тойже.

Стих: Да будут уши Твои, * внемлюще гласу моления моего.

Тебе распеншагося и погребеннаго, ангел проповеда Владыку, и глаголаше женам: приидите видите, идеже лежаше Господь: воскрес бо, якоже рече, яко всесилен. Темже Тебе покланяемся единому безсмертному: Жизнодавче Христе, помилуй нас.

Стих: Аще беззакония назириши Господи, Господи, кто постоит? * яко у Тебе очищение есть.

Крестом Твоим упразднил еси, юже от древа клятву, погребением Твоим умертвил еси смерти державу: востанием же Твоим просветил еси род человеческий. Сего ради вопием Ти: благодетелю Христе Боже наш, слава Тебе.

Стих: Имене ради Твоего, потерпех Тя Господи, потерпе душа моя в слово Твое, * упова душа моя на Господа.

Отверзошася Тебе Господи, страхом врата смертная, вратницы же адовы видевше Тя, убояшася: врата бо медная сокрушил еси, и верей железныя стерл еси, и извел еси нас от тьмы и сени смертных, и узы наша растерзал еси.

Стих: От стражи утренния до нощи, от стражи утренния, * да уповает Израиль на Господа.

Спасительную песнь поюще, от уст возслем: приидите вси в дому Господнем припадем, глаголюще: на Древе распныйся, и из мертвых воскресый, и сый в недрех Отчих, очисти грехи наша.

Таже стихиры мироносицам самогласны 3, глас 2-й: Анатолия.

Стих: Яко у Господа милость, и многое у Него избавление * и Той избавит Израйля от всех беззаконий его.

Мироносицы жены, утру глубокоу, ароматы взявша, Господня гроба достигоша, яже не надеяхся обретша помышляху благоговеюще каменному

отвалению, и друга ко друзей глаголаху: где суть печати гроба? где есть Пилатова кустодия, и опасное утверждение? Бысть же возвеститель не разумевающим женам, блистайся ангел, и глаголай к ним: что с рыданием ищите живаго и оживотворившаго род человеческий? Воста Христос Бог наш из мертвых яко всемогущ, подавай всем нам нетление и жизнь, просвещение и велию милость.

Стих: Хвалите Господа вси языцы, похвалите Его вси людие.

Почто мира со слезами, о ученицы растворяете, камень отвалися, гроб истощися: видите тлю животом попоранную, печати свидетельствующя явственно, спящия люте стражники непокоривых, смертное спасеся плотию Божиею, ад рыдает. Текша радостию рцыте апостолом: умертвивый смерть Христос, первоорожден из мертвых, вас предваряет в Галилеи.

Стих: Яко утвердися милость Его на нас: и истина Господня пребывает во век.

Мироносицы рано бывша, и гроб Твой со тщанием достигша, искаху Тебе Христе, во еже помазати пречистое тело Твое. И ангеловыми глаголы огласившися, радостотворныя образы апостолом проповедаху, яко воскресе Начальник спасения нашего, пленивый смерть, мирови же даруяй живот вечный и велию милость.

Слава: глас 6-й: Космы монаха:

Мироносицы жены, гроба Твоего достигша, и печати гробныя видевша, не обретша же пречистаго тела Твоего, рыдающа со тщанием приидоша, глаголюща: кто украде наше упование? кто взят мертв нага смиренною помазан, Матери едино утешение? О како мертвыя ожививый умертвися? ад пленивый, како погребешся? Но воскресни Спасе самовластно, якоже рекл еси, тридневен, спасаяй души наша.

И ныне: Богородичен, глас 2-й:

Прежде сень законная, благодати пришедши: якоже бо купина не стараше опаляема, тако Дево родила еси, и Дева пребыла еси. Вместо столпа огненнаго, праведное возсия Солнце: вместо Моисея, Христос, спасение душ наших.

Вход: Свете тихий: **Прокимен:** Господь воцарися:

На литии стихиры самогласны, глас 1-й:

Мироносицы жены, ко гробу что приидосте? что ищите живаго в мертвых? Воскресе Господь, дерзайте, вопиет ангел.

Со страхом приидоша жены на гроб, ароматы тело Твое помазати тщаяся: и сие не обретше, недоумевахуся друга ко друзей, не ведуще Воскресения. Но предста им ангел, и рече: воскресе Христос, даруяй нам велию милость.

Приидоша на гроб Магдалина, и другая Мариа ищуще Господа, и ангела видевша яко молнию сядяща на камени, и глаголюща им: что ищите живаго с мертвыми? воскресе, якоже рече: в Галилеи Его обрящете. К Нему же возопиим: воскресый из мертвых, Господи слава Тебе.

Слава: глас 6-й:

Проси Иосиф тело Иисусово, и положи е в новом своем гробе: подобаше бо Ему из гроба, яко от чертога пройти. Сокрушивый державу смерти, и отверзый врата райская человеком, Господи слава Тебе.

И ныне: Богородичен. глас тойже:

Творец и Избавитель мой Пречистая, Христос Господь из Твоих ложесн прошед, в мя оболкийся, первыя клятвы Адама свободи. Темже Ти Всечистая, яко Божии Матери же и Деве, воистинну вопием немолчно: радуйся ангельски, радуйся Владычице, предстательство и покрове, и спасение душ наших.

На стиховне стихира воскресна, глас 2-й:

Воскресение Твое Христе Спасе, всю просвети вселенную и призвал еси Твое создание: всеильне Господи слава Тебе.

Таже стихире Пасхи, глас 5-й:

Стих: Да воскреснет Бог и расточатся врази Его.

Пасха священная нам днесь показася: * Пасха нова святая: * Пасха таинственная: * Пасха всечестная: * Пасха Христос Избавитель: * Пасха непорочная: * Пасха великая: * Пасха верных: * Пасха, двери райския нам отверзающая: * Пасха, * всех освящающая верных.

Стих: Яко исчезает дым, да исчезнут.

Приидите от видения, * жены благовестницы, * и Сиону рцыте: * приими от нас радости благовещения * Воскресения Христова: * красуйся, ликуй * и радуйся, Иерусалиме, * Царя Христа узрев из гроба, * яко жениха происходяща.

Стих: Тако да погибнут грешницы от Лица Божия, а праведницы да возвеселятся.

Мироносицы жены, * утру глубоку * предсташа гробу Живодавца, * обретоша Ангела * на камени сядуща, * и той, провещав им, * сице глаголаше: * что ищете Живаго с мертвыми? * Что плачете Нетленного во тли? * Шедше, * проповедите учеником Его.

Стих: Сей день, егоже сотвори Господь, возрадуемся и возвеселимся в онь.

Пасха красная, * Пасха, Господня Пасха! * Пасха всечестная нам возсия. * Пасха! * Радостию друг друга обымем. * О Пасха! * Избавление скорби, * ибо из гроба днесь, * яко от чертога, * возсияв Христос, * жены радости исполни, глаголя: * проповедите апостолом.

Слава: глас 5-й:

Тебе одеющагося светом яко ризою снем Иосиф с Древа с Никодимом, и виде мертв нага непогребена, благосердный плач восприим, рыдая глаголаше: увы мне сладчайший Иисусе, Егоже в мале солнце на Кресте висима узревшее мраком облагашеся, и земля страхом колебашеся, и раздирашеся церковная завеса: но се ныне вижу Тя, мене ради волею подъемша смерть. Како погребу Тя Боже мой, или какою плащаницею обвиню? коима ли рукама прикоснуся нетленному Твоему телу? или кия песни воспою Твоему исходу Щедре, величаю страсти Твоя, песнословлю и погребение Твое со Воскресением, зовый: Господи слава Тебе.

И ныне, глас 5-й:

Воскресения день, * и просветимся торжеством, * и друг друга обымем. * Рцем: братие, * и ненавидящим нас * простим вся Воскресением * и тако возопиим: * **Христос воскрес из мертвых, смертию смерть поправ и сущим во гробех живот даровав.**

Таже, **Н**ыне отпускаеши: На благословении хлебов тропарь **Б**огородице Дево:
[Трижды]

Аще ли случится не быти бдению: поются на **Г**осподи воззвах: стихиры воскресны, 4. И мироносиц с литийными, на 6. Вход. Прокимен. На стиховне стихиры Пасхи. Слава, и ныне: глас 5, **Т**ебе одеющагося светом: На Полунощнице канон Троичен поется по обычаю.

Ведомо же буди, яко от Недели святого Фомы, не бывает хлебомломление по благословении хлебов, за краткость нощи.

В НЕДЕЛЮ 3-Ю ПО ПАСЦЕ, СВЯТЫХ МИРОНОСИЦ.

НА УТРЕНИ,

На Бог Господь: тропарь, глас 2-й:

Егда снизшел еси к смерти, животе безсмертный, тогда ад умертвил еси блистанием Божества. Егда же и умершие от преисподних воскресил еси, вся силы небесныя взываху: Жизнодавче Христе Боже наш, слава Тебе. [Дважды.]

Слава:

Благообразный Иосиф, с Древа снем пречистое тело Твое, плащаницею чистою обвив, и вонями во гробе нове покрыв положи: но тридневен воскресл еси Господи, подай миру велию милость.

И ныне:

Мироносицам женам, при гробе представ ангел вопияше: мира мертвым суть прилична, Христос же истления явился чуждъ. Но возопийте: воскресе Господь, подай миру велию милость.

По 1-м стихословии седальны, глас 2-й:

Камень гробный запечатати не возбранив, камень веры воскресый подал еси всем: Господи слава Тебе.

Стих: Воскресни Господи Боже мой, да вознесется рука Твоя:

Недро пречистое в вышних не истощивый, погребение и Воскресение о всех приял еси: Господи слава Тебе.

Слава, и ныне: Богородичен:

Вся паче смысла, вся преславная Твоя, Богородице, таинства, чистоте запечатанной, и девству храниму, Мати позналася еси неложна, Бога рождши истиннаго: Того моли, спастися душам нашим.

По 2-м стихословии седальны, глас 2-й:

Мироносицы утро пришедшия, и гроб тощ видевшия, апостолом глаголаху: тление низложи державный, и сущия во аде исхити уз: проповедите дерзновением, яко воскресе Христос Бог, даруяй миру велию милость.

Стих: Исповемся Тебе Господи, всем сердцем моим:

Миры погребения Твоего жены носяща, тай ко гробу приидоша уранше, иудейския боящися дерзости, и воинов предзряще утверждение. Но естество немощное мужество победы: яко намерение милостивное Богу угоди. Прилично убо взываху: воскресни Господи, помози нам, и избави нас славы ради имене Твоего.

Слава, и ныне: Богородичен:

Препрославленна еси Богородице Дево, поем Тя: Крестом бо Сына Твоего низложися ад и смерть умертвися: умерщвлении востахом и живота сподобихомся, рай восприяхом древнее наслаждение. Тем благодаряще славословим, яко державнаго Христа Бога нашего, и единого Многомилостиваго.

И чтение во Евангелии толковом по чину своему.

По Непорочнах тропари: Ангельский собор:

И абие ипакои. Глас 2-й:

По страсти шедше во гроб жены, во еже помазати тело Твое, Христе Боже, видеша ангелы во гробе, ужасошася: глас бо слышаху от них: яко воскрес Господь, даруяй миру велию милость.

И абие степенны, глас 2-й:

Антифон 1-й:

На небо очи пуцаю моего сердца, к Тебе Спасе: спаси мя Твоим осиянием.

Помилуй нас согрешающих Тебе много на всякий час, о Христе мой, и даждь образ прежде конца покаяться Тебе.

Слава, и ныне:

Святому Духу, еже царствовать подобает, освящати, подвизати тварь: Бог бо есть, единосущен Отцу и Слову.

Антифон 2-й:

Аще не Господь бы был в нас, кто доволен цел сохранен быти от врага, купно и человекоубийцы?

Зубом их не предаждь Спасе, Твоего раба: ибо львовым образом на мя подвизаются врази мои.

Слава, и ныне:

Святому Духу живоначание и честь: вся бо созданная, яко Бог сый, силою соблюдает во Отце, Сыном же.

Антифон 3-й:

Надеющиеся на Господа, уподобишася горе святых: иже никакоже движутся прилоги вражиими.

В беззакония рук своих да не прострут божественне живущии: не оставляет бо Христос жезла на жребии Своем.

Слава, и ныне:

Святым Духом точится всяка премудрость: отсюда благодать апостолом, и страдальчества венчаются мученицы, и пророцы зрят.

Прокимен, глас 2-й: Востани Господи Боже мой повелением, имже заповедал еси, и сонм людей обыдет Тя.

Стих: Господи Боже мой, на Тя уповах, спаси мя.

Всякое дыхание:

Евангелие утреннее воскресное 3-е, от Марка, зачало 71. [Мк. 16, 9 – 20.]

Во время оно воскрес Иисус заутра, в первую субботу, явися прежде Марии Магдалины, из неяже изгна семь бесов. Она же шедши возвести с Ним бывшим, плачущимся и рыдающим. И они слышавше, яко жив есть, и виден бысть от нея, не яша веры. По сих же двема от них грядущема явися ином образом, идущема на село. И та шедша возвестиста прочим: и ни тема веры яша. Последи же возлежащим им единомунадесяте явися, и поноси неверствию их и жестосердию, яко видевшим Его воставша не яша веры. И рече им: шедше в мир весь, проповедите Евангелие всей твари. Иже веру имет и крестится, спасен будет, а иже не имет веры, осужден будет. Знамена же веровавшим сия последуют:

именем Моим бесы ижденут; языки возглаголют новы; змия возмут; аще и что смертно испиют, не вредит их; на недужныя руки возложат, и здрави будут. Господь же убо, по глаголании Его к ним, вознесся на небо, и седе одесную Бога. Они же изшедше проповедаша всюду, Господу поспешствующу и слово утверждающую последующими знаменьми. Аминь.

Таже: Воскресение Христово видевши, поклонимся: [Трижды], Псалом 50, и прочее.

Канон Пасхи со ирмосом, и с Богородичны его, на 6. Таже настоящия Недели, Триоди канон на 8, глас 2-й: Творение господина Андреа Критскаго.

Катавасия: Воскресения день:

Песнь 1.

Ирмос: Воскресения день, * просветимся, людие: * Пасха, Господня Пасха! * От смерти бо к жизни * и от земли к небеси * Христос Бог нас преведе, * победную поющия.

Припев: Христос воскрес из мертвых.

Очистим чувства * и узрим неприступным светом Воскресения * Христа блистающуюся, * и радуйтесь рекуща, * ясно да услышим, * победную ноюще.

Небеса убо достойно да веселятся, * земля же да радуется, * да празднует же мир, * видимый же весь и невидимый: * Христос бо воста, веселие вечное.

Иный канон Богородичен, подобен. Егоже краестроchie на первых тропарех: Феофанус. Глас тойже.

Умерщвления предел сломила еси, вечную жизнь рождающая Христа, из гроба возсиявшего днесь, Дево Всенепорочная, и мир просветившего.

Воскресшего видевши Сына Твоего и Бога, радуйся со апостолы Богоблагодатная Чистая: и еже радуйся первее, яко всех радости вина, восприяла еси, Богомати Всенепорочная.

Иный канон мироносиц, в немже поставим стихов 8.

Песнь 1. Глас 2-й:

Ирмос: Моисейскую песнь восприимши, возопий душе: Помощник и Покровитель бысть мне во спасение, Сей мой Бог, и прославлю Его.

Распялся еси плотию, безстрастный естеством Отчим: прободен был еси в ребра, источивый миру кровь и воду: Ты Бог наш, и прославляем Тя.

Крест Твой почитаю, и погребение славлю Блаже, и пою, и покланяюся востанию Твоему, и взываю: Ты Бог наш, и прославляем Тя.

Аще и вкусил еси желчи, сладосте церковная, но источил еси нам нетление от ребр Твоих: Ты Бог наш, и прославляем Тя.

Вменился еси Спасе с мертвыми, мертвыя воздвигнувый, вкусил еси тли: истления бо всяко не познал еси: Ты Бог наш, и прославляем Тя.

Да веселится Сион, да радуется и небо, воскрес Христос, мертвыя воздвигнувый, песнословящая: Ты Бог наш, и прославляем Тя.

Плащаницами обвив Иосиф тело Твое Христе, во гробе нове положи Ты спасение: Ты же мертвыя яко Бог воскресил еси.

Предварившия утро жены, видеша Христа, и божественным вопияху учеником: воистинну Христос воскресе, приидите с нами воспойте Его.

Слава: Всесвятая Троице, едино Божество, безначальная Единице, Отче и Сыне и Божественный Душе, спасай мир: Ты Бог наш, и прославляем Тя.

И ныне: Древнюю клятву разрешивши Чистая, во утробе Твоей возрастила еси нам благословение, Младенца родивши: Сей бо Бог, аще и плоть носит.

Катавасия Воскресения день ...,

Песнь 3.

Ирмос: Приидите, пиво прием новое, * не от камене неплодна чудодеемое, * но нетления источник, * из гроба одождивша Христа, * в Немже утверждаемся.

Ныне вся исполнишася света, * небо же и земля, и преисподняя: * да празднует убо вся тварь * востание Христово, * в немже утверждается.

Вчера спогребохся Тебе, Христе, * совостаю днесь воскресну Тебе, * сраспинахся Тебе вчера. * Сам мя прослави, Спасе, * во Царствии Твоем.

Богородичен:

На нетленную жизнь прихожду днесь благодатию Рождшагося из Тебе Чистая, и всем концем свет облиставшаго.

Бога Егоже родила еси плотию, из мертвых, якоже рече, воставша видевши Чистая, ликуй, и Сего яко Бога Пречистая возвеличай.

Ин.

Ирмос: Неплодствовавший мой ум, плодоносен Боже покажи ми, делателю добрых насадителю благих, благоутробием Твоим.

Длани на Кресте простерл еси Иисусе, языки вся от прелести собрав, к познанию Твоему созвал еси Спасе.

Иудейстии людие Пилату вопиют: отпусти нам злодейственного разбойника, возми, возми распни Безгрешнаго.

Распеншуся Тебе Христе, помрачися свет, земля потрясется, и из гробов мертвии восташа мнози, страхом державы Твоея.

Предстоящи Кресту Агница Твоя Иисусе, плачем вопияше: камо идеши Сыне? камо грядеши Агнче, за всех заклавыйся?

Поклоняюся Твоему Кресту, воспеваю и погребение, почитаю страсти, и гвоздя руку, и копие Иисусе, и Воскресение Твое.

Воскресл еси Иисусе, пленен бысть враг, Адам избавися, и Ева с ним от уз и тли, Воскресением Твоим.

Воскресну Тебе Христе, сокрушишася верей и врата адова, и смертныя узы разрушишася, абие страхом державы Твоея.

Богоприемче Иосифе гряди, стани с нами, воскресе зовый, Иисус Избавитель, воздвигнувший Адама благоутробием Своим.

Да радуется с нами учеников двенадцатица, с мироносицами женами и Иосифом, и со другими ученики и ученицами Христовыми.

Слава: Со Отцем и Сыну и Духу Правому, единому Естеству покланяюся и воспеваю, Лицы разделяя, и Существом соединяя.

И ныне Богородичен: Блаженна еси Чистая, из корене Иессеова сущая, из негоже жезл и цвет Христа, по плоти нас ради возрадившая.

Катавасия: Приидите, пиво пием новое ...,

Таже кондак, глас 8-й:

Аще и во гроб снизшел еси, Безсмертне, * но адову разрушил еси силу и воскресл еси, яко победитель, Христе Боже, * женам мироносицам вещавый: радуйтесь, * и Твоим апостолом мир даруй, падшим подай воскресение.

Икос: **Е**же прежде солнца Солнце запещенное иногда во гроб, предвариша ко утру, ищущия яко дне мироносицы девы, и друга ко друзей вопияху: о другини, приидите, вонями помажем Тело живоносное и погребенное, плоть Воскресившаго падшаго Адама, лежащую во гробе. Идем, потщимся, якоже волсви, и поклонимся, и принесем мира яко дары, не в пеленах, но в плащанице обвитому, и плачем, и возопиим: о Владыко, востани, падшим подай воскресение.

И седален глас 2-й:

Подобен: Вышних ища:

Мира тепле гробу приносят жены Спасе, ангела светлостию души веселяху, и Бога Тя всех проповедаху, и учеником вопияху: воистинну воскресе из гроба всех Жизнь.

Слава и ныне: глас тойже:

Учеников Твоих лик с мироносицами женами радуется согласно: общий бо праздник с ними празднуют, в славу и честь Твоего Воскресения. И теми вопием Ти Человеколюбче Господи: людям Твоим подаждь велию милость.

Песнь 4.

Ирмос: На Божественной стражи * богоглаголивый Аввакум * да станет с нами и покажет * светоносна Ангела, * ясно глаголюща: * днесь спасение миру, * яко воскресе Христос, * яко Всесилен.

Мужеский убо пол, * яко разверзый девственную утробу, * явился Христос: * яко человек же, * Агнец наречется: * непорочен же, * яко невкусен скверны, * наша Пасха, * и яко Бог истинен * совершен речется.

Яко единоклетный агнец, * благословенный нам венец Христос, * волею за всех заклан бысть, * Пасха чистительная, * и паки из гроба красное * правды нам возсия Солнце.

Богоотец убо Давид, * пред санным ковчегом * скакаше играя, * людие же Божии святии, * образов сбытие зряще, * веселимся Божественне, * яко воскрес Христос, * яко Всесилен.

Богородичен тойже:

Создавый Адама Твоего праотца Чистая, зиждется от Тебе, и смертное жилище разори Своею смертию днесь, и озари вся Божественными блистаньями Воскресения.

Егоже родила еси Христа, прекрасно из мертвых возсиявша Чистая зрящи, добрая и Непорочная в женах и красная, днесь во спасение всех, со апостолы радуящихся Того прославляй.

Ин.

Ирмос: **Е**же от Девы Твое рождество пророк предзря, воспроповедаше вопия: слух Твой услышах, и убояхся, яко от юга и из горы святых приосененный пришел еси Христе.

Крестом пленил еси адово чрево, и совоздвигл еси мертвые, и смерти разрушил еси мучительство: темже иже от Адама покланяющияся, поем погребение Твое и востание Христе.

Благоволивый Спасе наш, за благоутробие милости пригвоздитися на Кресте, и от праотчия избавити ны клятвы, разреши узы многих моих согрешений: можеша бо, елика хочеша творити.

На Кресте пригвоздивый мою древнюю клятву, и источивый мне Спасе, благословение кровию от ребр Твоих, разреши узы многих моих согрешений: можеша бо, елика хочеша, творити.

Ад Спасе, срет Тя в преисподних, огорчися помышляя, яко яже древле пожрети возмогий, ныне неволею отдав, истязуется в дольних, и пленяемъ и обнажаемъ бывает мертвых.

Аще и камень запечатася с кустодиею, о беззаконнии врази, но воскресе Господь, якоже прорече, разрешая узы многих моих согрешений: может бо, елика хочет, творити.

Воскресый из гроба, и пленивый ада, и ожививый мертвые, и нетление источивший мне Твоим востанием, разреши узы многих моих согрешений: можеша бо, елика хочеша, творити.

Воистинну постыдитесь беззаконнии, Христос бо воскрес, и совоздвиже мертвые, зовый: дерзайте, аз победих мир. Веруйте убо Ему, или умолчите лестцы, отмечающия Воскресения Его.

Мироносицам, еже радуйтесь, воскресый от гроба, возгласив Блаже, и апостолом проповедайте востание Мое, разреши узы многих моих согрешений: можеша бо, елика хочеша, творити.

Иосифа благообразного, ревнителя благочестия, советника и ученика, с мироносицами почтим, и апостолами, зовуще с ними, и верно воспевающе Спасово Воскресение светло.

Слава: **П**ресущнаго Божества нераздельную славу, кто возможет изрещи? Едино бо Естеством сущи Троица поется безначальная, срасленная яко Единица, в Троице певаемая Ипостасьми простыми.

И ныне, Богородичен: **В**о чрево Твое всельшагося безмужно рождающая Мати Дево Чистая, непрестанно моли яко Богородица, разрешити узы многих моих согрешений: можеша бо, елика хочеша помощи.

Катавасия: **Н**а Божественной стражи ...,

Песнь 5.

Ирмос: Утренюем утреннюю глубоку * и вместо мира песнь принесем Владыце, * и Христа узрим правды Солнце, * всем жизнь возсияюща.

Безмерное Твое благоутробие, * адовыми узами содержимии зряще, * к свету идящу, Христе, * веселыми ногами, * Пасху хваляще вечную.

Приступим, священоснии, * исходящу Христу из гроба, яко жениху, * и спразднуем любопразднственными чинми * Пасху Божию спасительную.

Богородичен:

Просвещается Божественными лучами и живоносными Воскресения Сына Твоего, Богомати Пречистая, и радости исполняется благочестивых собрание.

Не разверзл еси врата девства в воплощении, гроба не разрушил еси печатей Царю создания: отонудуже воскресшаго Тя зрящи Мати, радовашеся.

Ин.

Ирмос: Мгду души моя Спасе мой разгнав светом заповедей Твоих озари мя, яко един Царь мира.

Ты первую одежду мою, юже ми истка, увы мне, сеятель греха, совлека еси Спасе мой, облекся в мя.

Листвие смоковное спи мне грех мой, увы мне, не сохранишему, Спасе мой, пречистую заповедь Твою, змииным советом.

Уязвившуюся душу мою разбойническими помышленьми моими, представый иже от Марии, и елей возлив, исцели Христос.

У Креста предстоящи Пречистая Богородица, матерски зываше: оставил Мя еси едину, о Сыне Мой и Боже!

Ты злоначальнаго змия оружием Креста Твоего низложив, Твоим востанием, сокрушил еси жало смерти Иисусе.

Где твое, смерте, жало? где твоя, аде, победа? Адам да свошлет: сокрушился еси оживлением воздвигшаго мертвья.

Мироносицы жены гроба Твоего достигшия, оживившаго дольних, глас слышаху глаголющий: воскрес Христос.

Благочестивых мироносиц память совершающе, и всех ученик Твоих, в светлом Твоем востании, воспеваем Тя Христе.

Благообразнаго вси почтим достойно, иже тело Господне от Древа сня, и погребе верно.

Слава: Тебе Богу и Отцу, и Сыну, и Духу покланяюся, трем Ипостасем, и едино три верую, Существом единым.

И ныне, Богородичен: Тя безсеменным Рождеством родившую паче естества обновившаго естество, Христа единого Владыку воспеваем вернии.

Катавасия: Утренюем утреннюю глубоку ...,

Песнь 6.

Ирмос: Снизшел еси в преисподняя земли * и сокрушил еси верей вечныя, * содержащая связанныя, Христе, * и тридневен, яко от кита Иона, * воскресл еси от гроба.

Сохранив цела знамения, Христе, * воскресл еси от гроба, * ключи Девы не вредивый в рождестве Твоем, * и отверзл еси нам райския двери.

Спасе мой, * живое же и нежертвенное заклание, * яко Бог Сам Себе * волею привел Отцу, * совоскресил еси всероднаго Адама, * воскрес от гроба.

Богородичен:

Возведеса древле держимое смертию и тлением, воплотившимся от Твоего пречистаго чрева, к нетленной, и присносущней жизни, Богородице Дево.

Сниде в преисподняя земли, в ложесна Твоя Чистая спешый, и вселивыйся и воплотивыйся паче ума, и воздвиже с Собою Адама, воскрес от гроба.

Ин.

Ирмос: Во глубине греховней содержимъ есмь Спасе, и в пучине житейстей обуреваемъ: но якоже Иону от зверя, и мене от страстей возведи, и спаси мя.

Мертв есть ад, дерзайте земнороднии, Христос бо на Древе висый, верже оружие нань, и лежит мертв: яже бо имяше, пленися обнажився.

Пленися ад, дерзайте мертвии, и гроби отверзошася, востаните от ада, вопиет вам Христос, вся пришедый избавити от смерти и тли.

Мертвыя якоже возмог пожерл еси иногда, ныне истязуемъ аде, отдаждь Ми, вопиет тебе Жизнодавец и Бог, вся пришедый избавити от несытаго твоего чрева.

Жены мироносицы, что тщитесь прочее? что же живому мира приносите, воскресе Христос, якоже предрече. Да престанут вапша слезы, прешедшия на радость.

Плещаницею Тя Христе обвив Иосиф благообразный, во гробе положи: миропомазав же разоренный Твоего телесе храм, привали камень великий ко гробу.

Господь воскресе пленивый врага, и узники исторгнув, возведе вся, и первозданнаго Адама, того возставляя, яко Благоутробен и Человеколюбец Бог.

Слава: Троицу во Единстве воспоим вернии, с Сыном Отца славяще, и Духа единосущна Сыну, и суща во Отце собезначальнаго и присносущнаго Бога.

И ныне, Богородичен: Во чреве неводеланно зачала еси Чистая, нетления грозд, яко лоза: из неяже безсмертия токи, якоже вино нам источают вечную жизнь.

Катавасия: Снизшел еси в преисподняя земли ...,

Кондак, глас 2-й:

Радоватися мироносицам повелел еси, плач праматере Евы утолил еси Воскресением Твоим Христе Боже, апостолом же Твоим проповедати повелел еси: Спас воскресе от гроба.

Икос:

На гроб Твой Спасе мироносицы идущия, к себе недоумеваяху умом, и вещаху: кто нам камень отвалит гробный? И воззревша видят, яко камень отвален бе, зраку же ангелову со одеянием дивляхуся: содержими же бяху трепетом, и бежати помышляху. и к ним юноша возопи: не бойтеся вы, Егоже ищите воста,

приидите, видите место, идеже лежаше тело Иисусово, и скоро шедшия возвестите учеником: Спас воскрес от гроба.

Синаксарь Миней. Таже настоящий.

Стихи: Христу носят ученицы мира:

Аз же сим песнь, яко мира ношу.

В сий день Неделю третью по Пасце, святых жен мироносиц праздник празднуем. Еще же и память творим иже от Аримафеа Иосифу, иже бе ученик сокровен от седмицех един сый. К сим же и нощнаго ученика Никодима, иже от князей ко Христу приступи. Зане жены убо тыя суть, свидетеліе неложныя и первыя Воскресения, Иосиф же и Никодим погребения: яже убо и истиннейшая суть и содержительнейшая, еже по нам догмата. Абие бо Никодим убо от сонмища изгнан бысть, не изволя иудеем смудрствовати. Иосиф же по еже погребсти Господне тело, в ров от иудей вметаємь бывает, и Божественною силою отонуду восхищается и во Аримафей во свое отечество отходит. И воскрес Христос, ему является, узами содержиmu, и уверяет ему вящше Воскресения таинство. Многа же и от иудей стражда, молчанию таинственная даяти не стерпе, но со дерзновением вся бывшим учаše. Глаголетсѧ убо, яко и Никодим сей потонку яже о страсти Христове, и о Воскресении сочинением уясни первый всех, яко сонмища сый, и известнее и советы иудей и словеса и проста вся ведый. И сея ради вины, якоже рекохом, яко неложнии погребения свидетеліе, с видевшими женами Воскресение учинишасѧ. И по первом Фомине уверении оному предучинено бысть, яко по днех осмих, глаголет, прииде благовестіе. Жены убо сѧ, первыя Воскресение видеша, и учеником сѧ благовестишѧ. Подобаше бо первее падшему племени под грех, и клятву наследствовавшему, тому первее и Воскресение видети, и радость внушити, первее слышавшему: в печалех родиши чада. Мироносицы же наречены бышѧ: зане Пасхи настоящей пятка {уготовления} ради, яко велик день бѧше субботы оныя, елма тѧхасѧ и погребсти тело Господне Иосиф и Никодим, иже по иудейскому обычаю миры Сего помазаша, но не якоже достояше: алой бо, и смирну вящше вложивше, и плащаницею обвивше, гробу предашѧ. Сего ради сѧ любовь тепле ко Христу имущѧ, яко ученицы, мира многоценныя купившия, нощію приидошѧ. Купно убо и иудейскаго ради страха, купно же яко и обычай бе ранее оплакати и помазати то, и оскудное за скорость времени тогда навершити, егда пришедшия различная явления видеша, блистающасѧ же два ангела внутрь гроба, и на камени сѧдѧща другаго: по сѧх же Христа видѧт, и покланяютсѧ. Магдалина же и яко оградника мнящи, Того о Самом вопрошаше. Многи убо бышѧ мироносицы, но евангелисти о нарочитых точію сотворше поминание, другія оставишѧ. Бѧху же сѧ: первая всех Магдалина Маріа, из неяже и демонов семь Христос изгна, яже и по Христове вознесении в Рим пришедши, яко словом новым, смерти Пилата и архиереа предает, яже о Спасе Христѧ Тиверию кесарю возвестивши. Последи же во Ефесе умирает, и от Богослова Иоанна погребаетсѧ: от Премудраго же Льва в Константинѧ град приноситсѧ. Вторая же Саломіа, яже естѧ Обручника Иосифа дщи, сице бо и обоих именоваху, яже дщи его, Зеведеа имяше мужа, от неяже евангелист Иоанн и Иаков родистасѧ. Четыри бо сыны мужеска полу роди Иосиф: Иакова, глаголемаго Малаго, и Иосію, Симона, и Иуду, и дщери три: Есфирь,

Фамарь и Саломии Зеведеову. Якоже егда слышиши во Евангелии, Марию Иакова Малаго, и Иосиеву Матерь, Богородицу непщуй быти, яко Матерь Иосифовых чад Богородица вменяшея: якоже приключится отсюда, сестричищу быти Христову евангелисту Иоанну, яко братню сыну. Третья же мироносиц есть Иоанна жена Хузаня, иже бяше назиратель и строитель дому царя Ирода. Четвертая же, и пятая, Мариа и Марфа, сестре Лазареве. Шестая Мариа Клеопина. Седмая Сосанна, и иныя множайшия бяху, якоже Лука божественный повествует: яже бяху, глаголет, служащия Христу, и учеником Его, от имений своих. Яко убо тыя Воскресение проповедаша, и многия по нам догматы сказаха, во уверение и извещение истинное Воскресения Христова. По Фоме и сим прият праздновати Христова Церковь, яко видевшим первым Христа от мертвых воскресша, и всем известившим спасительное проповедание, и еже по Христе жителство прошедшим изрядно, и якоже достояше женам наученным от Христа. Святых мироносиц молитвами, Боже помилуй нас.

Песнь 7.

Ирмос: Отроки от пещи избавивый, * быв Человек, * страдает яко смертен, * и страстию смертное * в нетления облачит благолепие, * Един благословен * отец Бог и препрославлен.

Жены с миры богомудрыя * в след Тебе течаху: * Егоже, яко мертва, со слезами искаху, * поклонившася радующияся Живому Богу, * и Пасху тайную * Твоим, Христе, * учеником благовестиша.

Смерти празднуем умерщвление, * адово разрушение, * иного жития, вечного, начало, * и играюще поем Виновного, * Единого благословенного * отец Бога * и препрославленного.

Яко воистинну священная * и всепразднственная сия спасительная ночь, * и светозарная, * светоноснаго дне, * востания сущи провозвестница: * в нейже безлетный Свет * из гроба плотски всем возсия.

Богородичен:

Умертвив Сын Твой смерть, Всенепорочная днешь, всем смертным пребывающий живот во веки веков дарова, един благословенный отец Бог и препрославленный.

Всем царствуяй созданием, быв Человек, вселися в Твою Богоблагодатная утробу, и распятие претерпев и смерть, воскресе Боголепно, совозставив нас яко всемогущ.

Ин.

Ирмос: Херувимы подражающе отроцы в пещи ликовствоваху, вопиюще: благословен еси Боже, яко истинною и судом навел еси сия вся, грех ради наших: препетый и препрославленный во вся веки.

Ты яко Человеколюбец, хотяи вся спасти от прелести, яже создал еси, претерпел еси пригвоздиться на Кресте: да погребенный образ страстьми, сей плотию Твоею обновивши Спасе, и ад низложив, воскресил еси и умершия с Собою.

На Кресте возвышаемь, вся призвал еси к Себе Щедре, якоже обещал еси Блаже: яко воистинну вся сия грехов ради наших пострадати благоволил еси. Темже и разбойнику райская врата отверзл еси Спасе.

Ты храм телесный воздвигл еси разоренный, тридневно из гроба, якоже обещал еси Блаже: да воистинну скажеш славу Твою, юже нам источаеши верою, узы разрешив, ихже держаше древле ад связанных.

О иудейское безумие! о неистовство беззаконных! Что неверное видеши, не вероваште Христу? яко немощныя, не словом ли воздвиже? Или яко весь мир Той не спасе ли, да уверяют вас поне воины, или воскресшие из мертвых.

О мертвевший стражие ныне да глаголют, како украден бысть, Егоже не видеши неразумнии всегда? Аще бо воскресши не видеши, ни ощутиши, како украдена Сего разумети можаху когда? Да уверит вы поне камень сей, и погребальная Христова.

Что яко мертва блюдете? что печати на камени положиште еврею, страхом боящися крадения? Се воистинну гроб запечатлесе: како убо воскресе, аще не бы Бог был Христос? Да уверяют вы воскресшии, и видени бывшии многими.

Слава: Со Отцем славим Сына, и Духа Святаго, вопиюще непрестанным гласом: Троице единственное Существо, помилуй, спаси вся, в трех Лицах Единице ущедрив ны, препрославленный Боже во веки.

И ныне, Богородичен: Во чреве Твоем Пречистая, како вместила еси Младенца, Егоже трепещут силы ангельския яко Бога? Разве якоже восхоте, якоже весть вселися, вся спасти хотяй от Адама земнородныя, разрешивый Адама клятвы оныя, снедию горькою.

Катавасия: Отроки от пещи избавивый ...,

Песнь 8.

Ирмос: Сей нареченный и святой день, * Един суббот Царь и Господь, * праздников праздник * и торжество есть торжеств: * вонже благословим Христа во веки.

Приидите, новаго винограда рождения, * божественнаго веселия, * в нарочитом дни Воскресения * Царствия Христова приобщимся, * поюще Его * яко Бога во веки.

Возведи окрест очи твои, Сионе, и виждь: * се бо приидоша к тебе, * яко богосветлая светила, * от запада и севера, и моря, * и востока чада твоя, * в тебе благословящая Христа во веки.

Отче Вседержителю, и Слове, и Душе, * трем соединяемое во Ипостасех Естество, * Пресущественне и Пребожественне, * в Тя крестихомся и Тя благословим во вся веки.

Богородичен

Прииде Тобою в мир Господь Дево Богородице, и чрево адово расторг, смертным нам воскресение дарова: темже благословим Его во веки.

Всю низложив смерти державу Сын Твой Дево, Своим Воскресением, яко Бог крепкий совознесе нас и обожил: темже воспеваем Его во веки.

Ин.

Ирмос: В купине Моисею Девы чудо, на Синайстей горе, прообразившаго иногда пойте, благословите и превозносите во вся веки.

Солнечныя зари спрятахуся страхом Христовых страданий, и востаяху мертвии, и горы преклоняхуся, и колебалася земля, и ад обнажалася.

В печи сущии иногда треблаженнии отроцы возвышающе руки, проображаху Блаже пречестный Крест Твой, имже низложил еси Христе вражюю силу.

О иудее слепии прелестницы и преступницы, Христову Воскресению неверующии, яко ложному: что неверное видите, яко воскресе Христос, мертвыя воздвигий?

О иудее врази, аще и нам не веруете, ваша воины вы вопросите, что пострадала они? Кто отваливый руками камень от гроба?

Кто изсушивый смоковницу? кто же сухую исцеливый руку? кто насытивый иногда множества в пустыни, аще не Христос Бог, мертвыя воздвигнувый?

Кто просветивый слепцы, и прокаженных очистивый, и хромые исправивый, и пешествовавый море немокрено яко сушу, аще не Христос Бог, мертвыя воздвигнувый?

Кто воздвигнувый мертва четверодневна из гроба, вдовича сына? кто стягнувый яко Бог разслаблена на одре, аще не Христос Бог, мертвыя воздвигнувый?

Зовет камень самый, печати вопиют, яже вы положивше, постависте стражу хранящую гроб: воистинну воскрес Христос, и живет во веки.

Воистинну воскресе Христос, пленен бысть ад, умертвися змий, избавися Адам, потрясошася дольнии: что не веруете прочее, врази и преступницы?

Благословим Отца, и Сына, и Святаго Духа Господа.

Со Отцем Сына, и Духа Святаго Святую Троицу в Божестве едином прославляем, вопиюще: Свят, Свят, Свят еси во веки.

И ныне, Богородичен: Во чреве Твоем Чистая, присноживотный хлеб, смешенный несмесно, смешением нашим, родила еси непреложно единого Христа Бога во двою существу.

Хвалим, благословим, покланяемся Господеви:

Катавасия: Сей нареченный и святыи день ...

Честнейшую: не поем до отдания Пасхи во вся Недели.

Песнь 9.

Ирмос: Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

О Божественнаго, о любезнаго, * о сладчайшаго Твоего гласа! * С нами бо неложно * обещался еси быти * до скончания века, Христе: * Егоже, вернии, * утверждение надежды имуще, радуемся.

О Пасха велия и священнейшая, Христе! * О мудросте и Слове Божий, и сило! * Подавай нам истее Тебе причащатися * в невечернем дни Царствия Твоего.

Богородичен:

Согласно Дево, Тебе блажим вернии: радуйся двери Господня: радуйся граде одушевленный: радуйся, Еяже ради нам ныне возсия свет, из Тебе Рожденного из мертвых Воскресения.

Веселися и радуйся божественная дверь Света: зашедый бо Иисус во гроб возсия, просияв солнца светлее, и верныя вся озарив, Богорадованная Владычице.

Ин.

Ирмос: Преестественно плотию заченшую во чреве, от Отца безлетно предвозсиявшее Слово, в песнях немолчных величаем вернии.

Иже на Кресте разбойника познавша Тя Бога, наследника соделал еси мысленному раю, еже помяни мя вопиюща, Всесильне Спасе.

Заушен нас ради, и оплеван был еси Иисусе от беззаконников, скрижали закона начертавый в Синаи, угодиniku Моисею.

Отца и желчи Спасе, напоен был еси нас ради, давый нам тело и честную кровь, в снедь же и питье вечныя Твоя жизни.

В животворная ребра копием прободен быв Христе, пречистую Твою кровь, и честную воду источил еси миру, яко присноживотный источник.

Вменился еси в мертвых, оживлей мертвыя: во гробе положен еси, истощивый гробы: пленил еси ад, воскресив Адама.

Воскресл еси Иисусе, связан бысть враг, пленился ад, испразднишася гроби, восташа дольнии, покланяющиеся Тебе Христе.

Кто украдый мертвого, паче же и нага? что льститеся еврею? Христос воскрес, и разрушаются адовы узы и верей.

Слава Тебе Христе Спасе, источивый жизнь, и свет возсиявый сущим во тме неведения, и всю землю просветивый востанием Твоим.

Благообразный советник Иосиф, да поется с мироносицами, и божественными ученики, яко проповедник сый и сей, востания Христова.

Иосифа чуднаго да восхвалим вернии, купно с Никодимом, и мироносицами верными, вопиющия: Господь воскрес воистинну.

Слава: Безначален еси Отче, несозданен еси Сыне, сопрестолен и Душе Святой, едино [Сия три] Естеством, и три Лицы, едине Боже истинный.

И ныне, Богородичен: Да веселится Иессей, да ликовствует и Давид: се бо Дева Богорасленный жезл прозябе, цвет присноживотный Христа.

Катавасия: Светися, светися

Таже, Свят Господь Бог наш. На глас 2-й:

Ексапостиларий Пасхи. Самогласен:

Плотию уснув, * яко мертв. * Царю и Господи, * тридневен воскресл еси, * Адама воздвиг от тли * и упразднил смерть: * Пасха нетления, * мира спасение. [Единожды]

Слава: мироносицам:

Жены услышите глас радования: мучителя ада поправый, от тли мир воздвиже, тецыте, другом рцыте Моим благовестия: хочу бо создание Свое радостию озарити, отонудуже прииде печаль.

И ныне: тойже.

На хвалитех, Всякое дыхание: поставим стихов 8.

И поем стихиры воскресны 4, глас 2-й:

Стих: Сотворити в них суд написан: слава сия будет всем преподобным Его.

Всякое дыхание и вся тварь, Тя славит Господи, яко Крестом смерть упразднил еси, да покажешаи людем, еже из мертвых Твое Воскресение, яко един Человеколюбец.

Стих: Хвалите Бога во святых Его, хвалите Его во утверждении силы Его.

Да рекут иудее, како воины погубиша стрегущии Царя? почто бо камень не сохрани Камене жизни? Или погребеннаго да дадят, или Воскресшему да поклонятся, глаголюще с нами: слава множеству щедрот Твоих, Спасе наш, слава Тебе.

Стих: Хвалите Его на силах Его, хвалите Его по множеству величества Его.

Радуйтесь людие и веселитесь, ангел седяй на камени гробнем, той нам благовести, рек: Христос воскрес из мертвых, Спас мира, и исполни всяческая благоухания: радуйтесь людие и веселитесь.

Стих: Хвалите Его во гласе трубнем: хвалите Его во псалтири и гуслех.

Ангел убо еже радуйся, прежде Твоего зачатия Господи, Благодатней принес: ангел же камень славнаго Твоего гроба в Твое Воскресение отвали: ов убо в печали место, веселия образы возвещая: сей же в смерти место, Владыку Жизнодавца проповедуя нам, темже вопием Ти: Благодетелю всех, Господи слава Тебе.

И восточны [анатолиевы] 4:

Стих: Хвалите Его в тимпане и лице, хвалите Его во струнах и органе.

Возлияша мира со слезами на гроб Твой жены, и исполнишася радости уста их, внегда глаголати: воскрес Господь.

Стих: Хвалите Его в кимвалех dobroгласных:

Да похвалят языцы и людие Христа Бога нашего, волею нас ради Крест претерпевшаго, и во аде тридневновавшаго, и да поклонятся Его из мертвых Воскресению, имже просветишася всего мира концы.

Стих: Воскресни Господи Боже мой, да вознесется рука Твоя:

Распят и погребен был еси Христе, якоже изволил еси, испровергл еси смерть, и воскресл еси во славе, яко Бог и Владыка, даруя мирови жизнь вечную, и велию милость.

Стих: Исповемся Тебе Господи всем сердцем моим:

О воистинну беззаконнии печатавшии камень, больших нас чудес сподобисте! Имут разум стражие, днесь пройде из гроба, и глаголаху: рцыте, яко нам спящим,

приидоша ученицы, и украдоша Его. И кто крадет мертвеца, паче же и нага? Сам воскрес самовластно яко Бог, оставь во гробе и погребательная Своя. Приидите видите иудее, како не расторже печати смерть поправый, и роду человеческому безконечную жизнь даруяй, и велию милость.

Слава: глас 2-й: Стихира евангельская:

С миры пришедшим яже с Мариєю женам, и недоумевающимся, како будет им улучшить желание, явился камень взятый, и божественный юноша утоляяй мятеж душ их: воста бо, глаголет, Иисус Господь. Темже проповедите проповедником Его учеником, в Галилею тещи, и видети Его воскресша из мертвых, яко Жизнодавца и Господа.

И ныне: Преблагословенна еси Богородице Дево:

Славословие великое. Тропарь воскресен. Ектении, и отпуст. И обычное исхождение в притвор. И поучение Студитово. И час 1-й. И совершенный отпуст. На часах тропарь воскресен. Слава: Благообразный Иосиф: И ныне: Богородичен часов. По Трисвятом кондак: Радоватися мироносицам: Такожде бывает и на прочих часах.

НА ЛИТУРГИИ

Блаженна гласа, на 4, глас 2-й, и от канона дне, песнь 6, на 4.

Помяни Благоутробне и нас, якоже помянул еси разбойника во Царствии Небеснем.

Древо изгна Адама, Крест введе разбойника в Царство Небесное.

Гроб подъят Тя Спасе, гробы истощившаго, и мертвым живот даровавшаго, яко Бога.

Апостоли славнии Христовы, Того молити прилежно, да от бед спасет ны.

Мертв есть ад, дерзайте земнороднии, Христос бо на Древе висий, верже оружие нань, и лежит мертв: яже бо имяше, пленися обнажився.

Пленися ад, дерзайте мертвии, и гроби отверзошася, встаните от ада,

Слава: Троицу во Единстве воспоим вернии, с Сыном Отца славяще, и Духа единосущна Сыну, и суща во Отце собезначальнаго и присносущнаго Бога.

И ныне, Богородичен: Во чреве неводеланно зачала еси Чистая, нетления грозд, яко лоза: из неяже безсмертия токи, якоже вино нам источают вечную жизнь.

По входе тропарь, глас 2-й:

Егда снизшел еси к смерти, животе безсмертный, тогда ад умертвил еси блистанием Божества. Егда же и умершия от преисподних воскресил еси, вся силы небесныя взываху: Жизнодавче Христе Боже нац, слава Тебе.

И тропарь, глас 2-й:

Благообразный Иосиф, с Древа снем пречистое тело Твое, плащаницею чистою обвив, и вонями во гробе нове покрыв положи: но тридневен воскресл еси Господи, подавай миру велию милость.

Слава: кондак, глас 2-й:

Радоватися мироносицам повелел еси, плач праматере Евы утолил еси Воскресением Твоим Христе Боже, апостолом же Твоим проповедати повелел еси: Спас воскресе от гроба.

И ныне: таже кондак Пасхи, глас 8-й:

Аще и во гроб снизшел еси, Безсмертне, * но адову разрушил еси силу и воскресл еси, яко победитель, Христе Боже, * женам мироносицам вещавый: радуйтесь, * и Твоим апостолом мир даруй, падшим подавай воскресение.

Прокимен, глас 6-й: Спаси Господи люди Твоя, * и благослови достояние Твое.

Стих: К Тебе Господи воззову, Боже мой, да не премолчиши от мене.

Апостол Деяний, зачало 16. [Деян. 6, 1 – 7.]

Во дни оны, умножившимся учеником, бысть роптание еллином ко евреям, яко презираеми бываху во вседневнем служении вдовицы их. Призвавше же дванадесять множество ученик, реша: не угодно есть нам, оставльшим слово

Божие, служити трапезам. Усмотрите убо, братие, мужи от вас свидетелствованы седмь, исполнены Духа Свята и премудрости, ихже поставим над службою сею. Мы же в молитве и служении слова пребудем. И угодно бысть слово сие пред всем народом. И избраша Стефана, мужа исполнена веры и Духа Свята, и Филиппа, и Прохора и Никанора, и Тимона, и Пармена, и Николаа пришельца Антиохийскаго. Иже поставиша пред апостолы, и помолившиеся положиша на ня руки. И слово Божие растяше, и множашеся число ученик во Иерусалиме зело: мног же народ священников послушаху веры.

Аллилуиа, глас 8-й: Благоволил еси Господи землю Твою, возвратил еси плен Иаковль.

Стих: Милость и истина сретостеся, правда и мир облобызастеся.

Евангелие от Марка, зачало 69. [Мк. 15, 43 – 16, 8.]

Прииде Иосиф, иже от Аримафеа, благообразен советник, иже и той бе чая Царствия Божия, дерзнув вниде к Пилату, и проси телесе Иисусова. Пилат же дивися, аще уже умре: и призвав сотника, вопроси его: аще уже умре? И уведев от сотника, даде тело Иосифови. И купив плащаницу и снемь Его, обвит плащаницею: и положи Его во гроб, иже бе иссечен от камене: и привали камень над двери гроба. Мариа же Магдалина и Мариа Иосиева зрясте, где Его полагаху. И минувшей субботе, Мариа Магдалина и Мариа Иаковля и Саломиа купиша ароматы, да пришедша помажут Иисуса. И зело заутра во едину от суббот приидоша на гроб, возсиявшу солнцу, И глаголаху к себе: кто отвалит нам камень от дверей гроба? И возревша видеша, яко отвален бе камень: бе бо велий зело. И вшедша во гроб, видеша юношу сидяща в десных, одяна во одежду белу: и ужасошася. Он же глагола им: не ужасайтесь: Иисуса ищите Назарянина распятаго: воста, несть zde: се, место, идеже положиша Его: Но идите, рцыте учеником Его и Петрови, яко варяет вы в Галилеи: тамо Его видите, якоже рече вам. И изшедша бежаша от гроба: имяше {одержаше} же их трепет и ужас: и ни комуже ничтоже реша: бояхубося.

Вместо же Достойно, поем:

Ирмос: Ангел вопияше Благодатней: Чистая Дево радуйся, и паки реку, радуйся: Твой Сын воскрес тридневен от гроба, и мертвыя воздвигнувый: людие веселитесь. Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Причастный: Тело Христово примите:

Другий: Хвалите Господа с небес:

Аще храм святых жен мироносиц, на Малей и Велицей вечерни, и на Утрени, и на Литургии, поем во всем подобне, якоже великомученику Георгию. Точно на Вечерни паремии чтем, писаны в Неделю всех святых.

На Утрени по полиелеи величание поем сице:

Величаем вас святые мироносицы, и чтим святую память вашу: вы бо молитесь о нас Христа Бога нашего.

Псалом: Блажен муж бояйся Господа: и прочая.